

■ CONVIVENZA

Er in pover utschè sgola puspè

DA BETTINA CADOTSCH*

Jau sun tranteren in zic in pover utschè. Betg adina, però adina puspè. Per il mument hai jau gist puspè ina seria da discletgs che para da betg vulair charlar.

Sch'jau hai da descriver mamezza, lura di jau adina ch'jau saja in uman che na tira mai en chalzers cun tatgs auts, ch'è però er abel da dar en venter cun sneakers. Quai vul dir ch'jau saja in carstgaun madester. Quai m'ha sfurzà gia diversas giadas dad ir cun crutschas, perquai ch'jau hai stgarpà ils lioms dal pe cun dar tgutgamain giu da stgala. Jau sun er ina che glischna adina ora sin il glatsch e sch'igl ha insanua in paltaun èsi cler ch'jau zaplien. Ina da mias qualitads è dentant ch'jau na ma prend betg memia serius e poss era rir sur da mamezza.

Ma enavos tar mia seria da discletgs actuala. Cumenzà ha tut cun sponder insatge da baiver. Quai è atgnamain insatge che capita pli tgunsch ad uffants. Jau fatsch l'ultim temp però adina puspè tgutgs moviments e svid ora la bavronda sin maisa. Tup. Penibel. Na stuess betg esser. Cuntinuà hai cun mes abunament da skis ch'jau hai pers giu da la sutgera cun avrir ina serrane-



tga fallada. En pli hai jau adina discletg sch'i va per l'aura. Sch'jau hai la fin d'emna in program, nua ch'jau duvrass bell'aura, lura èsi segir e franc trid'aura. Uschia èsi era stà dacurt cura ch'jau hai gi in fin d'emna da skis cun amis – dal reminent cun quels amis ch'jau hai gi avant in onn discletg cun l'aura. In'ulteriura tuppada m'è alura anc capitada avant paucs dis. Il classicher che capita cun scriver lavurs da diplom è sa verifitgà era tar mai – jau hai gi in problem cun memorisar la lavur ed hai pers datas. Per fortuna m'èn però idas a perder sulettamain trais paginas.

Vus vesais, insaco tenti simplamain. Cun mintga eveniment ch'è vegnì vitiers sun jau perquai ma dumandada: Tge hai jau fatg fallà ch'i capita d'in cuntin da quels incaps? Savens din ins gea era che quai haja da far insatge cun il destin. Jau na crai però betg ch'i vegnia adina ena-

vos dal bun, sch'ins è in bun carstgaun ed il cuntrari. Per gliez capita memia blera malgiustia sin quest mund. Natiralmain n'è, guardà a lunga vista, tut quai ch'è capità a mai era nagut tragic. I dat lunschor anc pli nauschas chaussas, quai che ha la fin dal di er adina puspè laschè surrir mai.

Ames avis na datti nagina resposta a la dumonda pertge ch'i capita tranteren blers incaps. Forssa che serias da discletgs èn dentant bunas per daventar conscient ch'ins ha uschiiglio cletg en la vita. Cun far patratgs davart tut questas tematicas sun jau anc ma dumandada co ch'ins definiescha insumma cletg u disfortuna. Chattà ina defniziun scorta n'hai jau betg. Mettain perquai che quai è per tuts enorm different. En mintga cas sun jau da l'opiniun ch'igl è per nus umans pli lev da realisar, sch'i capita insatge negativ. Perquai ves jau mia seria da discletgs sco segn ch'jau haja dad esser pli engraziaivla per ils buns temps e per ils muments, en il quals jau di: «Ussa hai jau gi cletg che...». Cura ch'jau hai puspè ina giada in tal mument al vegn jau definitivamain a stimar spezialmain!

* Bettina Cadotsch è creschida si a Savognin. Ella studegia Multimedia Production a la Scola auta spezialisada dal Grischun e lavura tar Radio Südostschweiz e «suedostschweiz.ch»